

De Bischof war beim Worschtverkoschte

Klein awer fein! Worschkoschtprob in Maria Radna

„Schun vor guti phaar Monat han ich unser Bischof gfroot, ob mer die Worschkoschtprob (WKP) 2016 im Touristeninformationszentrum Maria Radna abhalle kennte. Un prompt hat unser Bischof geantwort: `Natierlich`! Was nit jeder Bischof gsaat hätt“! So hat Werner Kremm, verantwortlicher Redakteer der „Banater Zeitung“, Bischof Martin Roos bei der Worschkoschtprob 2016 begrießt. Es war die erschi WKP, bei der vorher e Andacht (in der Kloschterkerch), un sogar in Anwesenheit vum Bischof abghal gin is, der ach beim Worschtverkoschte derbei war. Dechant Andreas Reinholz, der for die Kloschterkerch in Maria Radna zuständig is, hat in der Schurie de Worscht verkoscht. De dritte anwesende Pharre, Ion Cadarean, hat die Gäscht später dorch die Kerch un es Kloschtermuseum gfiehr. Un bei sovill anwesender Geischtlichkeit hats gar nit annerscht sin kenne: Die WKP, zwar in kleene Rahme, war e voller Erfolg.

Obzwar Gäscht aus Temeschwar, Reschitza un Lugosch uf Radna kumm sin, war die Mehrheit der Teilnehmer ausm Kreis Arad: Lippa/Radna, Sanktanna, Glogowatz, Giorok, Neiarad un anri Ortschafte.

Die Bäsl Anna Stroie war aus Blumethal kumm, weil se sich doch ach mol die WKP hat „anschaue wille“. Vum Deutsche Konsulat aus Temeschwar war de Vizekonsul Siegfried Geilhausen mit seiner Frau Geraldine zur WKP kumm. Un er hat betont, dass es ihne stark leed tut, weil des for sie die letschi WKP is, an dere se teilnehme kenne. Ihre Amtszeit in Temeschwar nähert sich geger End.

Vum Fettbrot zu Schokoladitortne

Sicher willt der ach wisse, wie dass es bei dere WKP in Maria Radna zugang is. Noh de Ansprachen seitens Werner Kremm, Bischof Martin Roos, Iosif Mircea Jichici, Bürgermeister in Lippa/Radna, un Siegfried Geilhausen is erschter klassischi Musich gebot gin. Des war im Erdgeschoss vum Informationszentrum. Un dort ware a die Tische mit de Worschtprowe for die Schurie gericht. Ach e Tisch mit „Siessichkeite“ hat uf Verkoschter gewart: Maas- un Nussestrudl sowie Schokoladitortne, die vun Ramona Lambing, eener Schwowin aus Orzydorf, gebackt gin sin. Un die Bäsl Ramona hat die Idee ghat, mer sellt bei so eem Ereignis uf jede Fall ach Fettbrot antraan. Des war dann ach, scheen mit Salz, rotem Paprika un Schnittlauch bestreit, uf große Tatzle gelee un newedran roti Zwiwle ufgschnied. Großi Kerwle mit Grammlpogatschl un gsalzti Bretzle ware ausgestellt. Un in eener Vitrien han Dunschtgläser in Reih un Glied gstann, die ware angfillt mit in Fett ausgebrodnem Brotworscht, druf gschrieb awer „Worschkoschtprob 2016“. Zu trinke is angebot wore: Raki, Wein, Saft, Kaffee un Lippaer Mineralwasser.

Wann mer die Treppe nuf ins Dachgeschoss gang is, dorte sin em die Aue iwergeloff. Ausser Brotworscht ware ach Lewer- un Blutworscht, Schofkäs, Hauspeck sowie allerlei Salate angebot gin. Derzu hat mers sich mit Knowl, Senf, Ketschap oder Saurem schmecke losse kenne. Sogar Hausbrot aus Salonta is ufgetischt wore. Es war vun allem genuch do, die Leit ware begeischtert vun der WKP in Maria Radna.

Kummentar:

Vun der WKP in Maria Radna werd mit Sicherheit noch lang gered. Es war e gelungeni Veranstaltung un mol was ganz anres als bisher. Derzu kann mer die Veranstalter beglickwünsche. Sie han dermit die „Banater Zeitung“ mol wieder „mittels Worscht“ in aller Maul gebrung. Un des in der Lippaer/Radnaer Gegend. Vielleicht is der een oder anri derbei „uf de Gschmack kumm“ un abonniert die Zeitung, dass er ach im kummende Jahr bei der WKP (mer weess jo noch nit, wu die stattfinne werd) anwesend sin kann!